



Fidoyilik —
Vatanga xizmat demak!

2024-yil 4-iyul, payshanba,
78 (23.955)-son

**KUN
HIKMATI**

Inson o'z
xatosini
angladimi -
demak, u tajriba
orttirdi

1913-yil aprel oyidan chiqib boshlagan



www.zarnews.uz

https://www.facebook.com/zarnews.uz

@zarnews_uz

https://twitter.com/zarnews_uz



SAMARQAND va CHELYABINSK

o'rtasida aviaqatnov yo'lga qo'yiladi

Rossiya mintaqalari bilan hamkorlik aloqalarini mustahkamlash maqsadida amaliy tashrif bilan ushbu mamlakatda bo'lgan viloyat hokimi Erkinjon Turdimov Chelyabinsk viloyati gubernatori Aleksey Teksler bilan uchrashdi.

Muloqot chog'ida Samarqand va Chelyabinsk viloyatlarining iqtisodiy imkoniyatlari va investitsion salohiyati, hamkorlik yo'nalishlari haqida fikr almashildi.

E. Turdimov Chelyabinsk viloyati rahbarlari va tadbirkorlarini Samarqandga taklif qilib, sanoat, mashinasozlik, qishloq xo'jaligi va turizm sohalarida birgalikda loyihalarni amalga oshirish ikki tomon uchun ham manfaatli bo'lishini ta'kidladi.

O'z navbatida A. Teksler bu takliflarni qo'llab-quvvatlab, ikki tomonlama aloqalarni rivojlantirishga tayyorligini bildirdi. Shuningdek, Toshkentda o'tkazilgan O'zbekiston va Rossiya mintaqalari biznes-forumida kelishilgan Chelyabinsk va Samarqand o'rtasida to'g'ridan-to'g'ri aviaqatnovlarni tezroq yo'lga qo'yish lozimligini qayd etdi. Shundan so'ng Chelyabinsk shahri-

da Samarqand va Chelyabinsk viloyatlari tadbirkorlarining biznes-forumi o'tkazildi. Tadbir avvalida Samarqand viloyatining iqsodiy ko'rsatkichlari, tadbirkorlar uchun yaratilgan qulayliklar haqida taqdimot qilindi.

Forumda ikki tomondan 100 dan ortiq tadbirkorlar ishtirok etib, o'z mahsulot va xizmatlari haqida ma'lumot berdi. O'zaro manfaatli hamkorlik yuzasidan muzokaralar o'tkazildi.

Viloyat hokimligi axborot xizmatining ma'lum qilishicha, forum davomida viloyat hokimi E. Turdimov Chelyabinsk viloyatining yirik tadbirkor va kompaniyalari rahbarlari bilan ham uchrashib, hamkorlik bo'yicha kelishuvlarga erishdi.

Viloyatimiz delegatsiyasi Chelyabinsk viloyati sanoatni rivojlantirish jamg'armasi hamda "Moy biznes" xizmat ko'rsatish markazi faoliyati bilan ham tanishdi.

Madina — kelajak bunyodkori

Yoshlar — yurt ertasi

Madina Shodiyeva Payariq tumanida dunyoga kelgan. U bolaligidan tarjimon bo'lishni niyat qilardi. Madinaning qiziqish va intilishlarini vaqtida payqagan ota-onasi unga yetarlicha imkoniyat yaratib berdi. Ular o'zlari uchun amalga oshmagan oliy ma'lumotli bo'lish orzusining ro'yobini farzandlari taqdirida ko'rishni maqsad qilgandi va bunga erisha oldi.

Madina avval tumandagi 6-maktabda, keyin esa kollejni bitirib, Samarqand davlat chet tillar institutiga xitoy tili yo'nalishi bo'yicha o'qishga kirdi.

Xitoy tilini tanlaganim bejiz emas, - deydi u. - To'g'ri, o'rganish ancha qiyin, ammo qiziqarli. Shu bilan birga manfaatli. Sababi keyingi paytda O'zbekiston va Xitoy hamkorligi yaxshilanmoqda. Shuning uchun ham mamlakatimizga xitoylik sayyohlarning oqimi yil sayin ortib boryapti. Tarjimonlikka qiziqishim sababli talabaalik davrimdan shu ish bilan shug'ullanish maqsadida Registon ansambli amaliyot o'taganman.

O'zbekiston Respublikasi Prezidentining farmoniga asosan 30-iyun — Yoshlar kuni arafasida bir guruh yigit-qizlar «Kelajak bunyodkori» medali bilan mukofotlandi. Ular orasida Madina Shodiyeva ham bor.

Prezident bilan uchrashish eng katta orzularimdan biri edi,

- deydi M. Shodiyeva. — Bunga erishganimdan xursandman. Mukofotni davlatimiz rahbaridan olar ekanman, menga Xitoy va O'zbekiston hamkorligini mustahkamlash yo'lida olib borilayotgan ishlarga munosib hissa qo'shishim zarurligini aytidilar. Bu menga katta mas'uliyat yukladi. Ana shunday yutuqlarga erishish yo'lida menga ko'makdosh bo'lgan ota-onamdan, ustozlarimdan, institutda menga xitoy tilini o'rgatgan o'qituvchilarimdan, Registon ansambli jamoasidan minnatdorman. Mamlakatimizda yoshlarga qaratilayotgan e'tibor, yaratilayotgan imkoniyatlar Madina Shodiyeva kabi millionlab o'zbekistonlik yigit-qizlarga kuch-g'ayrat, shijoat bag'ishlab, ularni yangi marralar sari boshlaydi.

Hushnozabonu NIYOZOVA.

Poytaxtimizdagi Olimpiya va Paralimpiya shon-shuhrati muzeyida O'zbekiston sport delegatsiyasini Parij-2024 XXXIII yozgi Olimpiya o'yinlariga tantanali kuzatish marosimi o'tkazildi.

Boks bo'yicha jahon chempioni, Osiyo o'yinlari g'olibi Abdumalik Halakov hamda qilichbozlik bo'yicha Osiyo o'yinlari g'olibasini, "Shuhrat" medali sohibasi Zaynab Dayibekova Parij-2024 Olimpiya o'yinlarida



Nigina O'ktamova:

Maqsadimiz — yurtimiz bayrog'ini baland ko'tarish

O'zbekiston sport delegatsiyasining bayroqdorlari bo'lishi rasman e'lon qilindi.

Olimpiada chempionlari 200 ming, kumush medal sohiblari 100 ming, bronza medali sovrindorlari esa 50 ming dollardan pul mukofoti bilan taqdirlandi.

Marosimda boks bo'yicha jahon chempioni bo'lgan birinchi o'zbek qizi, samarqandlik Nigina O'ktamova ham so'zga chiqdi.

Davlatimizning e'tibori va Yurtboshimizning sportchilarni qo'llab-quvvatlashlari natijasida mamlakatimizda sport rivojlanyapti, yutuqlarga erishyapmiz, - dedi Nigina O'ktamova. — Xu-

susan, qo'lga kiritgan litsenziyalarimiz uchun ham pul mukofotlarini oldik. Bu bizga Parij-2024 Olimpiadasi oldidan boshlang'ich rag'bat va katta motivatsiya bo'ldi. Olimpiadaga munosib tayyorgarlik ko'rganimiz, maqsadimiz — olimpiada chempioni bo'lib, yurtimiz bayrog'ini baland ko'tarish.

Hozirga qadar olimpiya o'yinlariga yo'llanmani qo'lga kiritgan samarqandlik sportchilar 14 nafarga yetdi. Yo'llanmalar uchun reyting ballar to'plash davom etmoqda va viloyatimizdan 16 nafardan ziyod sportchining olimpiadaga borishi kutilmoqda.

O'zbekiston Respublikasi Prezidentining Virtual va Xalq qabulxonalariga joriy yilning birinchi yarmida viloyat aholisidan 68,8 mingga yaqin murojaat kelib tushgan bo'lib, o'tgan yilning mos davriga nisbatan 13 foizga oshgan. Ushbu murojaatlarning 50 ming 503 tasi, ya'ni 81 foizi qanoatlantirilgan. 525 tasi uzoq muddatli nazoratga olingan, 10 mingdan ortig'i bo'yicha tushuntirish berilgan va 763 tasi rad etilgan, 212 tasi ko'rmasdan qoldirilgan.

Albatta, har bir fuqaro o'zi va boshqalar bilan birga davlat organlari, tashkilotlarga murojaat qilish huquqiga ega. Bu yurtdoshlarimizning konstitutsion huquqlaridan biri hisoblanadi. Murojaatlar belgilangan muddatlarda ko'rib chiqiladi va bu haqda fuqarolarga javob beriladi.

Prezident Xalq qabulxonalarida fuqarolarning ana shu huquqlaridan foydalanishlarini ta'minlashga xizmat qilib kelayotgan institutlardan biridir.

Joriy yilning dastlabki olti oyi natijalari shuni ko'rsatmoqdaki, murojaatlarni ijobiy hal etish darajasi Samarqand (29 foiz), Toyloq (34 foiz), Past Darg'om (34 foiz) tumanlari hamda Kattaqo'rg'on (34 foiz) va Samarqand (34 foiz) shaharlarida past bo'lgan. Viloyatdagi Xalq qabulxonalarida nazoratida ko'rib chiqilgan 47 ming 266 ta murojaatning 18 mingga yaqini (39 foiz) ijobiy hal etilgan.

Xalq qabulxonalariga o'tgan davrda jismoniy va yuridik shaxslardan jami 4312 ta yozma va og'zaki murojaat kelib tushgan bo'lib, ularda 5 mingdan ortiq masala ko'tarilgan. O'tgan yilning shu davri bilan qiyoslaganimizda murojaatlar 2021 taga kamaygan. Lekin Virtual va Xalq qabulxonalariga Samarqand shahri hamda Past Darg'om, Urgut, Paxtachi va Payariq tumanlaridan murojaatlar ko'paygan.

Fuqarolar nega davlat rahbari qabuliga kirmoqchi?

Murojaatlarda asosan, pensiya va ijtimoiy ta'minot (7301 ta), ijro ishi, alimant va qarz undirish (6470 ta), elektr energiyasi (5402 ta) va gaz ta'minoti (4956 ta), huquqbuzarliklar (4724 ta), moddiy yordam va homiylik (3129 ta), huquqni muhofaza qilish organlari xodimlari faoliyati (1763 ta), davolash va tibbiy xizmat ko'rsatish (1700 ta), uy-joy bilan ta'minlash (1502 ta), bandlik (1427 ta), yo'l infratuzilmasi (1325 ta) bilan bog'liq masalalar eng ko'p qayd etilgan. Shu bilan birga, bank kreditlari, uy-joy fondini saqlash va boshqaruvchi tashkilotlar faoliyati, yo'l harakati xavfsizligi, sudlarda fuqarolik ishlari ko'rilishi bilan bog'liq murojaatlarning dolzarbligi oshgan.

Yarim yil davomida tushgan takroriy murojaatlar 9425 tani tashkil etgan va o'tgan yilning mos davriga nisbatan 34 taga oshgan. Bu fuqarolarning muammolariga o'z vaqtida yechim topilmagan yoki murojaatlarda ko'tarilgan masalalar yana takror sodir bo'lganidan dalolat beradi.

Jumladan, takroriy murojaatlar elektr energiyasi ta'minoti bo'yicha 414 ta (75 foiz)ga, gaz ta'minoti bo'yicha 165 ta (32 foiz)ga, bank kreditlari va tadbirkorlik yuzasidan 138 ta (383 foiz)ga pensiya va ijtimoiy ta'minot bo'yicha 135 ta (22 foiz)ga, sudlarda fuqarolik ishlari ko'rilishi yuzasidan 71 ta (69 foiz)ga oshgan. Eng ko'p takroriy murojaatlar Samarqand shahri (1116 ta), Past Darg'om (1086 ta), Kattaqo'rg'on (864 ta), Payariq (786 ta), Paxtachi (698 ta) va Urgut (674 ta) tumanlaridan kelib tushgan.

Tahlillar shuni ko'rsatmoqdaki, sektorlar

kesimida eng ko'p murojaat (18 ming 370 ta) uchinchi sektorlar hududidan, eng kam esa (16 ming 996 ta) to'rtinchi sektorlar hududidan qayd etilgan.

Mahallalar miqyosida esa Oqdaryo tumani Yangiobod mahallasining 155 nafar fuqarosidan 241 ta masala yuzasidan, Samarqand shahar Qorasuv massividan 144 nafar fuqarodan 192 ta masala bo'yicha, Past Darg'om tumani Bog'ishamol mahallasi 129 nafar fuqarosi tomonidan 282 ta masala bo'yicha, Paxtachi tumani Istiqloq mahallasida yashovchi 126 nafar fuqarodan 333 ta masala qayd etilgan murojaatlar kelib tushgan.

Bugungi kunda viloyatdagi tashkilotlar ish yurituvidadagi 3015 ta murojaatni ko'rib chiqishning quonunda belgilangan muddati buzilgan. Bu masala yuzasidan ham tegishli choralar ko'rilishi ta'minlangan.

Aholi murojaatlariga yechim topishda rahbarlarning joylarda sayyor qabullar o'tkazishi yaxshi samara bermoqda. Yilning birinchi yarmida viloyatda sektor rahbarlari tomonidan 2345 marta sayyor qabul o'tkazilib, 15 ming 760 nafar fuqarodan jami 16 ming 290 ta masala yuzasidan murojaatlar kelib tushgan. Bu murojaatlarning 63 foizi ijobiy hal etilgan.

Ammo mahalliy darajada hal etilishi mumkin bo'lgan masalalar o'z vaqtida ko'rib chiqilmagani, mas'ullar tomonidan aholiga mavjud muammolar va ularning yechimi bo'yicha tekzor va ishonchli axborot taqdim etilmayotgani oqibatida respublika darajasidagi rahbarlar, jumladan, davlat rahbari qabulini tashkil etish so'rovlari tushishda davom etmoqda. Xususan, viloyat

Xalq qabulxonalarida

aholisidan rahbarlar shaxsiy qabulini so'rab 489 ta, jumladan, davlat rahbari qabuliga kirish masalasida 208 ta murojaat kelib tushgan.

Muammolar joylarda o'z yechimini topmaganligi tufayli 6 oy davomida 393 nafar fuqaro 660 ta masala bo'yicha Toshkent shahriga borib, Prezident Xalq qabulxonasiga murojaat qilgan. Bu fuqarolarning 208 nafari Samarqand shahridan, 95 nafari Past Darg'om, 53 nafari Toyloq, 51 nafari Urgut va 41 nafari Paxtachi tumanida yashovchilardir.

Viloyat tashkilotlarining ko'p murojaat qiluvchi fuqarolar bilan manzillik ishlash darajasi ham sustligicha qolmoqda. Jumladan, yarim yilda 333 nafar fuqaro 10 martadan 50 martagacha, 10 nafari 50 martadan ko'p murojaat qilgan.

Yarim yillik faoliyat sarhisobi hamda aholining talab va takliflaridan kelib chiqib, davlat hokimiyati va boshqaruv organlari rahbarlari, sektor mas'ullari fuqarolar murojaatlari bilan ishlash, joylarda sayyor qabullar o'tkazish orqali ular bilan bevosita muloqot qilib, mavjud muammo va kamchiliklarga o'z vaqtida yechim topishlari zarur bo'ladi. Binobarin, yurtimizdagi islohot va o'zgarishlar inson manfaatlariga qaratilgan, davlat organlari xalqqa xizmat qilishi qat'i qoidaga aylangan ekan, buni barcha darajadagi rahbarlar unutmasligi lozim.

Mamatjon TURDIYEV,
O'zbekiston Respublikasi Prezidentining viloyatdagi Xalq qabulxonasi mudiri.

Tarsaki

Viloyat hokimligida o'tkazilgan muhokamada qayd etilishicha, joriy yilning o'tgan davrida viloyat bo'yicha "Yoshlar daftari"ga kiritilgan 12 ming 488 nafar yoshlarning 9054 nafari daftardan chiqarilgan.

"Daftar" dagi yoshlarga shumi e'tibor?

Ammo, yil boshida "Yoshlar daftari"ga kiritilgan bo'lishiga qaramasdan, hozirgacha Samarqand shahrida 38 nafar, Qo'shrabot tumanida 15 nafar, Urgut tumanida 32 nafar, Nurobod tumanida 15 nafar, Narpay tumanida 17 nafar, Payariq tumanida 25 nafar yoshlarga umuman e'tibor berilmagan, biron amaliy yordam ham ko'rsatilmagan.

Eng achinarlisi, 2023-yilda daftarga kiritilgan bo'lishiga qaramasdan Payariqda 195 nafar, Narpayda 168 nafar, Bulung'urda 88 nafar, Ishtixonda 87 nafar, Urgutda 80 nafar, Toyloqda 76 nafar va Samarqand shahrida 58 nafar yoshlarga hozirgacha biron turdagi yordam berilmagan.

Tuman va shahar hokimliklari yaqinda o'tkazilgan yoshlar oyligi davomida turli xil bo'lar-bo'lmas tadbirlar o'tkazgandan ko'ra, shu yoshlarga e'tibor bersa bo'lmasmi?..



Besh oyda 11 loyiha

qolgan 85 loyiha yil yakunigacha ishga tushadimi?

Joriy yil Past Darg'om tumanida hududiy investitsiya dasturi doirasida qiymati 89 million dollarlik 96 ta investitsiya loyihasi amalga oshiriladi. Ushbu loyihalar ishga tushirilishi natijasida 1589 ta yangi ish o'rni yaratiladi. Shu paytgacha 6,6 million dollarlik 11 ta loyiha ishga tushirilgan.

Loyihalarni sohalarda qaraydigan bo'lsak, sanoatda 4 ta, xizmat ko'rsatishda 5 ta, qishloq xo'jaligida 2 ta loyiha uchun 6,6 million dollar sarmoya jalb etilib, 175 ta yangi ish o'rni yaratildi, - deydi tuman hokimi o'rinbosari Aziz G'afurov. - Masalan, "MAX BOTTLETS" MChJ negizida 25 milliard so'mlik "Qurilish mollari bozori" loyihasi ishga tushirilib, 20 ta yangi ish o'rni, "Sherzod Reliable Stroy" MChJ tomonidan qiymati 1,4 milliard so'mlik "Temir beton devor, quvurlar va lotok ariqlar ishlab chiqarishni tashkil etish loyihasi" doirasida 5 ta yangi ish o'rni yaratildi.

"ALFATERM PLAST" MChJ tomonidan 2023-yilda 36 milliard so'mlik va 2024-yil birinchi chorakda 7,4 milliard so'mlik polietilen quvur va fittinglar, bochkalar, tsintefon ishlab chiqarildi. Hozirda korxonada Qozog'istonga 50 ming dollarlik polietilen bochkalar eksporti rejalashtirilmoqda.

Bundan tashqari, 2024-yilning dastlabki to'rt oyida investitsiya dasturi doirasida 10,2 million dollar xorijiy investitsiya mablag'larini o'zlashtirildi. "Ayisha Ar" MChJ QK negizida parrandachilik va baliqchilik xo'jaliklarini tashkil etish bo'yicha amalga oshirilgan ishlar hisobiga 4,3 million dollar va boshqa qo'shimcha hajmlar hisobiga 0,6 million dollar xorijiy investitsiya mablag'larini o'zlashtirildi.

Tumanda 2024-yilda 13,9 million dollarlik sanoat hamda 9,6 million dollar qishloq xo'jaligi mahsulotlarini eksport qilish rejalashtirilgan. Yilning besh oyida 5,9 million dollarlik mahsulot eksportga chiqarildi. Mahsulotlarimiz asosan Xitoy, Turkiya, Vetnam, Polsha, Eron, Rossiya, Tojikiston hamda Afg'oniston davlatlariga eksport qilinmoqda. Shu bilan birga, tumandagi ayrim korxonalar eksport rejasini bajarishda ortda qolmoqda. Buning sabablari tahlil qilinganda, qo'liqlarning asosiy qismi "Samarqand kamalak invest tekstil" MChJ hissasiga to'g'ri keldi. Bu jahon bozorida ip-kalava narxining keskin tushib ketishi bilan bog'liq. Ma'lumot uchun, o'tgan yili ip-kalavaning jahon bozorida narxi bir kilogramiga 3,5 dollar bo'lgan bo'lsa, joriy yilda ushbu mahsulotning narxi 2,2 dollarni tashkil qilmoqda.

Eksport rejasining bajarilishini ta'minlash maqsadida "Euroasia Feed Pro Samarkand", "Sam Elektr Invest", "Rainbow Agriscience" hamda "Sam Gloriya Granit" MChJlar eksport faoliyatiga yangidan jalb qilindi, - deydi tuman hokimligi mutaxassisi Muhammad Mahmudov. - Ushbu korxonalar tomonidan hozirgacha 434 ming dollarlik mahsulot eksporti amalga oshirildi. Bugungi kunda ushbu korxonalar tomonidan omuxta yem, kabel mahsulotlari, kimyoviy o'g'itlar hamda marmar toshlar eks-

porti yo'lga qo'yildi.

Tumanda 500 dan ortiq sanoat korxonasi faoliyat yuritayotgan bo'lib, ushbu korxonalarining 4 tasi yirik va 418 tasi esa kichik korxonalar hisoblanadi. Shundan qurilish materiallari ishlab chiqarish sohasida 155 ta, oziq-ovqat sanoatida 107 ta, mebelchilik sohasida 76 ta, tekstil va to'qimachilik sohasida 49 ta, elektrotexnikada 4 ta va boshqa sohalarda 131 ta korxonalar faoliyat ko'rsatmoqda. Ushbu korxonalar tomonidan yilning dastlabki uch oyida 361 milliard so'mlik sanoat mahsulotlari ishlab chiqarilgan. Ya'ni, ishlab chiqarish hajmi o'tgan yilning mos davriga nisbatan 105,3 foizga o'sgan.

Tadbirkorlikni rivojlantirish uchun tumaning Kimyogarlar massivi, Juma shahri, Gulobod, Oltiqahramon hamda Go'zalkent mahallalarida erkin iqtisodiy zona hamda kichik va yoshlar sanoat zonalarini tashkil etilgan. Bugungi kunda ushbu hududlardan jami 9 gektarga yaqin yer maydoni auktsion savdolari orqali tadbirkorlik subyektlariga taklif etilmoqda. Tumanning Chimboyobod massivida yangi sanoat hududini barpo etish uchun 234,3 gektar yer maydoni tanlanib, hozirda ushbu yer maydonini auktsion savdolariga chiqarish bo'yicha chora-tadbirlar amalga oshirilmoqda.

"Samplastservis" MChJ negizida uchta korxonalar tashkil etilib, eshik-romlar uchun rezina, alyumin va PVX profililar va boshqa mahsulotlar ishlab chiqarilmoqda, - deydi "Samarqand polimer" MChJ rahbari Otabek Eshonqulov. - Birgina "Samarqand polimer" MChJda "Biko" brendi ostida PVX profililar, eshik-romlar ishlab chiqarilmoqda. Hozirgacha 3 kamerali plastmassa profililar ishlab chiqarayotgandik, shu oydan 4 kamerali, 6 ming seriyali shunday mahsulot chiqarishni yo'lga qo'ydik. Bu "ASA" uslubini deyiladi, ya'ni ikki tomoni ikki xil rangda bo'ladi. Rejaga ko'ra, yil yakunigacha 5 kamerali 7 ming seriyadagi zamonaviy plastmassa mahsulotni bozorga chiqarishni mo'ljallayapmiz. Korxonamiz oyiga 250 tonna PVX ishlab chiqarish quvvatiga ega. Hozir esa 150 tonna mahsulot chiqaryapmiz. O'tgan yilda 50 milliard so'mdan ortiq mahsulot sotgan bo'lsak, joriy yil boshidan buyon 15 milliard so'mdan ortiq mahsulot eksport qilindi. Korxonamizda 120 nafar ishchi mehnat qilyotgan bo'lsa, yangi mahsulotlarni o'zlashtirishimiz bilan yana qo'shimcha ish o'rinlari yaratiladi.

Tumanda tadbirkorlik subyektlari soni bilan birga mahsulot ishlab chiqarish hajmi ham yil sayin ortib bormoqda. Hozirda mahsulotlar Markaziy Osiyo va MDH davlatlariga sotilayotgan bo'lsa, yaqin vaqtda eksport geografiyasini kengaytirib, xalqaro bozorlarga ham mahsulotlarimiz yetib borish choralari ko'rilmogda.

O'ktam XUDOYBERDIYEV,
"Zarafshon" muxbiri.

Qoradaryoda 330 metrlik zamonaviy ko'prik barpo etilyapti

Samarqand shahrini yangi qurilayotgan Shirin shaharchasi bilan bog'laydigan Qoradaryo ustidagi ko'prik qurilishi jadal olib borilmoqda.

Viloyat avtomobil yo'llari bosh boshqarmasi hamda "Samarqand mintaqaviy yo'llarga buyurtmachi xizmati" davlat muassasasi tomonidan tashkil etilgan press-tur ishtirokchilari viloyatdagi yirik ko'priknin qurilishi bilan tanishdi.

- Ayni vaqtda 35 metr chuqurlikda 298 ta beton ustun o'rnatib bo'lindi, - deydi uchastka boshlig'i Yusuf Mama-rahimov. - Daryoning o'ng qirg'og'ida tuproq tashish, burg'ulash va beton quyish ishlari davom etmoqda. 120 nafar quruvchi-muhandis va ishchilar mehnat qilayotgan ko'prik qurilishi 2022-yilda boshlangan bo'lib, hozirgacha 25 foiz ishlar bajarildi.

"1-Ko'prikqurilish otryadi" unitar korxonasi bosh pudratchiligidagi amalga oshirilayotgan mazkur ulkan inshoot daryodan 13,5 metr, M-39 avtomobil yo'li ustidan esa 12 metr balandlikdan o'tib, Samarqand xalqaro aeroportiga olib boruvchi yo'lga kelib qo'shiladi.

- Loyiha qiymati 260 milliard so'm bo'lgan umumiy uzunligi 330 metrni tashkil etuvchi ushbu ko'prikda 4 ta asosiy yo'l quriladi, - deydi "Samarqand mintaqaviy yo'llarga buyurtmachi



xizmati" davlat muassasasi direktori o'rinbosari Akbar Mirzayev. - 2026-yil yakunigacha foydalanishga topshirilishi ko'zda tutilgan ko'priknin qurilish ishlarga hozirgacha qariyb 35 milliard so'm sarflandi. Barcha ishlar rejada belgilanganidek davom etmoqda.

Shuningdek, jurnalistlar Samarqand shahridagi Universitet xiyoboni, Panjakent ko'chasidan M-37 avtomagistraligacha bo'lgan 3,8 kilometr yo'lni ta'mirlayotgan "New Tech-Samarqand" MChJ yo'lsolari ishi bilan ham tanishdilar.

- Hozirgacha yo'lning 1 kilometridagi ishlar yakunlandi, - deydi korxonaga mutaxassisi Jamol Rahimov. - Eniga 14



metrni tashkil etuvchi ko'chaning ikki chetidagi ariqlar betonlashtirilib, qariyb 2 kilometr piyodalar va veloyol'lar, gulxona qurilib, 50 ga yaqin tungi yoritish chiroqlari o'rnatildi. Yo'l yoqasidan o'tgan kommunikatsiya tarmoqlari lo'liq yangilandi.

Loyiha qiymati 57 milliard so'm bo'lgan mazkur obyektga piyodalar o'tish joylari, svetofo, yo'l belgilari va boshqa qurilmalar o'rnatiladi. Toyloq, Urgut va Samarqand tumanlarini azim shahar bilan bog'lovchi yo'l joriy yil yakunigacha foydalanishga topshirilishi ko'zda tutilgan.

Dilmurod TO'XTAYEV.

↓ So'rang, javob beramiz

O'ZGARISHSIZ TURGAN UY-JOYIMGA KO'CHIRMA OLIISH UCHUN PUL TO'LANADIMI?



- 2 ta yer uchastkam bor, biri kadastr qilinmagan. Shuni auktsion savdosiga chiqarib, sotib olsam bo'ladimi?

N.ORIPOV,
Samarqand shahri.

- Bo'sh turgan yer uchastkasi — binolar va inshootlar joylashmagan, hech qanday majburiyatlar yoki taqirlar o'rnatilmagan hamda jismoniy va yuridik shaxslarga qonunchilikka muvofiq ajratib berilmagan, davlat mulki bo'lgan, qishloq xo'jaligiga mo'ljallanmagan yer uchastkasi hisoblanadi. Ikkinchi yer uchastkasi bo'sh bo'lsa va qurilmalari bo'lmasa, auktsionga qo'yilishi mumkin. Lekin bo'sh turgan yerni e-auksionda boshqa bir fuqaroga yutib olish ehtimoli mavjudligini ham hisobga olish lozim.



- Turarjoyim 2017-yil davlat ro'yxatidan o'tgan. Yer mulkimda hozirgi kungacha hech qanday o'zgarish bo'lmagan. Lekin men xuddi shu uy-joyimga qaytadan ko'chirma olmoqchi bo'lsam, xizmat uchun yana pul to'lashim kerak bo'ladimi?

A.BEGIMOV,
Toyloq tumani.

- Murojaatga ko'ra, avval davlat ro'yxatidan o'tkazilib, amalda bo'lgan ko'chmas mulkka bo'lgan huquqlar (davlat ro'yxatidan o'tkazilganligi to'g'risida guvohnoma berilgan yoki huquqni belgilovchi hujjatga ustxat yozish yo'li bilan tasdiqlangan) to'g'risidagi ma'lumotlarni elektron tarzda davlat reyestriga kiritish va reyestrda ko'chirma berish davlat xizmatlari ko'rsatilgani uchun Vazirlar Mahkamasining 186-son qaroriga muvofiq yig'imlar undirilmaydi.

Savolga Davlat kadastrlari palatasi viloyat boshqarmasi bo'lim boshlig'i Alisher XOLMANOV javob berdi.

Hibsonadagi JUFTLIK oila munosabatlarini davom ettiradigan bo'ldi

Kattaqo'rg'on shahridagi 7-tergov hibsonasiga Ombudsmanning Samarqand viloyatidagi mintaqaviy vakili va jamoatchilik vakillari bilan hamkorlikda navbatdagi monitoring tashrifi amalga oshirildi.

Monitoring doirasida mahbuslar iltimosiga ko'ra, viloyat sog'liqni saqlash boshqarmasi bilan hamkorlikda tibbiy ko'rik tashkil etildi. Unda 17 nafar tor doiradagi shifokorlar guruhi va 2 ta ko'chma mobil oftalmolog, ultra tovush, EKG va laboratoriya uskunalarini olib borilib, 400 nafardan ortiq mahkum va mahkumalar tibbiy ko'rikdan o'tkazildi.

Ko'rik natijalariga asosan, mahbuslarga 12 turdagi 550 dona bepul dori-darmon tarqatildi. Ko'rish qobiliyati pasayganlarga shifokor xulosasi asosida 29 ta ko'zoynak berildi. Bundan tashqari, hibsona rahbari va tibbiy bo'lim boshlig'i bilan suhbatda 141 turdagi dori-darmon borligi hamda mahkum va mahkumalarga o'z vaqtida berilishi nazoratga olinishi lozimligi ta'kidlandi.

Monitoring davomida voyaga yetmaganlar, ayollar va erkaklar kamerasi ko'zdan kechirildi. Ularga sayr qilish, sport bilan shug'ullanish uchun sharoitlar yaratilgan ekan. Hudud-dagi issiqxonada qishloq xo'jaligi mahsulotlari yetishtirilmoqda.

Shuningdek, 57 nafar ayblanuvchi mahkum va mahkumalar bilan ommaviy suhbat o'tkazildi. Ularning 20 nafari yakka tartibda qabul qilinib, murojaatlari tinglandi. Alohida qabul jarayonida mahkum I.M va mahkuma M.A.lar ozodlikdan cheklangunga qadar 3 yil davomida shar'iy nikoh bilan yashab kelganligini bildirdi. Bugungi kunda ikkalasi ham 7-tergov hibsonasida saqlanayotganligi uchun qonuniy nikohdan o'tishda amaliy yordam berishni so'radi.

Shu kunning o'zida Kattaqo'rg'on shahar FHDY bo'limi mudirasi bilan bog'langanimizdan so'ng, mahkum va mahkumaning qonuniy nikohdan o'tkazish haqidagi arizalari mudira tomonidan rasmiylashtirilib, tibbiy ko'rikdan o'tish uchun yo'llanma berildi. Tibbiy ko'rik xulosasi bo'yicha ularga qonuniy tartibda nikoh guvohnomasi beriladigan bo'ldi.

Tergov hibsonasida joylashgan 5 ta "ombudsman quti"lari ko'zdan kechirilganda xuddi shunday 6 ta murojaat olindi. Ularda bildirilgan masalalar yuzasidan tegishli chora-tadbirlar belgilandi.

Monitoring davomida aniqlangan kamchiliklarni bartaraf etish bo'yicha hibsona mutasaddilariga aniq muddatli tavsiyalar berildi.

Diyor HUSANOV,
Ombudsmaning viloyatdagi mintaqaviy vakili.

Viloyat adliya boshqarmasi tomonidan press-tur o'tkazildi. Unda boshqarma boshlig'i Salohiddin Sattorov hamda boshqarma mas'ul xodimlari aholiga sifatli huquqiy yordam ko'rsatish borasida amalga oshirilayotgan ishlar to'g'risida ma'lumot berdi.

Dastlab "Mahalla yordami" Agram boti taqdimoti bo'lib o'tdi. Mazkur bot viloyat adliya boshqarmasi tomonidan mahallalar uyushmasi viloyat boshqarmasi bilan hamkorlikda ishlab chiqilgan.

— Mazkur bot orqali dastlabki bosqichda faqat ijtimoiy daftarlarda hamda "Ijtimoiy himoya yagona reyestri" axborot tizimiga kiritilgan fuqarolar qonunchilikda berilgan imtiyoz turlari, ulardan qanday foydalanish mumkinligi, qaysi vakolatli organga murojaat qilish, imtiyozlarni qo'llash tartibi va muddatlar haqida batafsil ma'lumot olish mumkin, — dedi S.Sattorov. — Mazkur imtiyozlarni qo'llash bo'yicha qonunbuzilish holatlarini aniqlangan taqdirda adliya boshqarmasiga murojaat qilish imkoniyati yaratilgan.

Boshqarma tomonidan "Mahalla yor-

"MAHALLA YORDAMI":

yangi telegram bot ishga tushirildi



Kun mavzusi

Suvda cho'kkan odamning nafas olishi bir necha soniyalar ichida to'xtaydi va hushini yo'qotadi. Agar uni 5 daqiqa davomida suvdan chiqarib, o'pka-yurak reanimatsiyasi o'tkazilmasa, miyaga kislorod yetib bormaydi va natijada to'qimalar o'lishni boshlaydi. 5-7 daqiqa-dan keyin esa insonni hayotga qaytarish imkoniyati kamayadi.

Suvga cho'kish tasodif emas

Bolalar nazoratsiz qoldirilgani, kattalar esa spirtli ichimlik iste'mol qilgan uchun bu falokatga duch kelyapti

Statistika agentligi ma'lumotiga ko'ra, respublikamizda 2023-yilning 1-yanvar holatiga ko'ra, 331 ta suzish havzasi mavjud. Ana shu suzish havzalarining 299 tasi shahar, 32 tasi qishloq joylarida. Yurtimizda aholi soni 37 milliondan oshganini hisobga olsak, suzish havzalari ehtiyojimizni qondirishga yetarli emas.

Xususan, qishloq joylaridagi suzish havzalari har bitta tuman bittadan ham to'g'ri kelmaydi. Bu odamlarning taqiqlangan hududlarda hayotini xavf ostiga qo'yib, cho'milishiga asosiy sabab. Ekspertiza xulosalari hamda tahlillariga qaraganda, aksariyat hollarda suvda cho'kish holati avvalo, taqiqlangan joylarda cho'milish, suzishni bilmaslik yoki spirtli ichimlik iste'mol qilish oqibatida yuzaga kelmoqda. Viloyatimizda keyingi 3 yilda Darg'om kanalida 3 ta, Zarafshon daryosida 2 ta, Kattaqo'rg'on suv omborida 1 ta holatda fuqarolarning suvda cho'kib vafot etishi qayd etilgan.

2021-2023-yillar mobaynida viloyat hududida fuqarolarning suvda cho'kib halok bo'lishlari bilan bog'liq holatlar monitoringiga ko'ra, halok bo'lganlarning 42,5 foizini 23 yoshdan 53 yoshgacha, 35 foizini 13 yoshdan 22 yoshgacha bo'lgan fuqarolar hamda 22,5 foizini 12 va undan kichik yoshda bo'lgan bolalar tashkil etmoqda, - deydi Samarqand shahar FVB tezkor bo'linma boshlig'i Sherzod Murodov. - Keyingi 5 yil davomida esa suvda cho'kib halok bo'lgan yoshi katta fuqarolarning 70 foizi spirtli ichimlik iste'mol qilgan holda cho'milgan. Bolalar esa ota-onalar nazoratsiz qolganiga sabab cho'kib, olamdan o'tayotgani kuzatilmog'ida.

Keyingi paytda yoz mavsumida cho'kish bilan bog'liq ko'ngilsiz hodisalar asosan yoshlar o'rtasida ko'p uchrayapti, - deydi viloyat favqulodda vaziyatlar boshqarmasi tabiiy va texnologiyasiz xususiyatli favqulodda vaziyatlar bo'limi bosh inspektori Anvar To'rayev. - Bunga ota-onalarning farzandlarini nazoratsiz qoldirishi, taqiqlangan hududlarda cho'milish va xavfsizlik qoidalarini bilmaslik sabab bo'lmoqda. Boshqacha aytganda, bunday joylarda cho'milayotganlar o'limni bo'yniga olyapti. Birinchi-

dan, ruxsat etilmagan suv havzalarida suvning gigiyenik holati talabga javob bermaydi. Ikkinchidan, suv sathining chuqurligi ma'lum emas. Uchinchidan, suv ostida turli zaharli hasharot va jon-zotlar bor. To'rtinchidan, suv harorati doimiy past va oqim tez.

Bugungi kunda viloyatda maxsus vazifalarni bajaruvchi mintaqaviy qutqaruv otryadi tarkibida qutqaruv g'avvoslar brigadasi mavjud bo'lib, ularda 10 nafar g'avvos faoliyat olib bormoqda. Suvda qutqarish ishlarini amalga oshirish bo'yicha barcha yetarli texnika va asbob-anjomlar mavjud va shay holat-



ga keltirilgan. Aytish joizki, joriy yilning o'tgan davrida suvda cho'kish bilan bog'liq muhim hodisa kuzatilmadi.

Viloyatda 20 ta cho'milish suv havzasi ro'yxatdan o'tgan. Cho'milish ruxsat etilmagan joylar (ko'llar, daryolar, kanal va ariqlar)da ta'qiqlovchi belgilar o'rnatildi. Ayni paytda mahallalarda, o'quv muassasalarida hamda suv xo'jaligi obyektlarida profilaktik tadbirlar davom etyapti.

Mutaxassislar tavsiyasiga ko'ra, cho'kish bilan bog'liq hodisalarning yuz bermasligi uchun avvalo, ruxsat etilgan joylarda cho'milish va xavfsizlik qoidalariga qat'iy rioya qilish lozim. Birinchi navbatda havo harorati issiq bo'lgan va shamol bo'lmagan vaqtda cho'milish tavsiya etiladi. Qorin och bo'lganda, charchaganda, tashnalikda, yaqinda bemorlikdan sog'ayganda, spirtli ichimlik ichganda, yolg'iz bo'lganda va quyosh urish xavfi bo'lgan hollarda cho'milish maqsadga muvofiq emas.

Fazliddin RO'ZIBOYEV.

Bu haqda kiberjinoiyatlarning oldini olish hamda aholini kiber olamdagi tahdidlardan asrashga bag'ishlangan matbuot anjumanida ma'lum qilindi.

Respublikamizda joriy yilning 1-iyulidan 31-iyuligacha qadar "Kibermadaniyatni yuksaltirish oyligi" (Cyber-month) o'tkazilmoqda. Oylik doirasida tashkil etilgan tadbirlarda viloyat hokimining raqamlashtirish masalalari bo'yicha maslahatchisi Anzor Anvarov, viloyat ichki ishlar boshqarmasi tezkor qidiruv xizmati kiberxavfsizlik bo'limi boshlig'i Azamat Yo'ldoshev, ichki ishlar vazirligi kiberxavfsizlik markazi mas'ul xodimi Shuhrat Mamadoliyev hamda boshqarma va tashkilotlar mas'ullari ishtirok etdi.

Kiberjinoiyat qurboni bo'layotganlarning aksariyatini yoshlar tashkil etmoqda, - deydi viloyat ichki ishlar boshqarmasi tezkor qidiruv xizmati kiberxavfsizlik bo'limi boshlig'i Azamat Yo'ldoshev. - Jumladan, viloyatda kiber jinoiyatlar soni o'tgan yilning shu davriga nisbatan bir yarim baravar oshgan va aldov qurboni bo'layotganlarning aksariyati 19-35 yoshdagi fuqarolardir. Ushbu firibgarliklar asosan uch xil usulda - telefonga maxfiy kod yuborish yoki bank xodimi sifatida "sms kodni olish" natijasida, chet eldan meros yoki jabrlanuvchiga noma'lum sharoitda yordam berish, moddiy yordam, onlayn kredit, yutuqli o'yin g'olibi kabi soxta aldov havolalar hamda soxta onlayn birja va treyding orqali amalga oshirilgan. Kiber jinoiyatlarning 40 foizi Samarqand shahrida 17-35 yosh toifasida, 30 foizi Kattaqo'rg'on shahar,

Kiber jinoiyatlar
1,5 baravar oshgan

Eng ko'p jinoiyat Samarqand shahrida sodir etilgan



Samarqand, Past Darg'om va Urgut tumanlarida 35-45 yosh toifasida, 20 foizi boshqa tumanlarda 45 yoshdan yuqori yosh toifasida kuzatilgan.

Matbuot anjumanida bu kabi jinoiyatlarning oldi olish, aholi o'rtasida targ'ibot tadbirlarini kuchaytirish maqsadida bir qator tanlovlar e'lon qilingani ma'lum qilindi.

Axborot texnologiyalari asrida kompyuter va raqamlashtirilgan turli xil texnikalar rivojlangani sari bundan g'arazli maqsadda foydalanuvchilar ham ortib

bormoqda, - deydi ichki ishlar vazirligi kiberxavfsizlik markazining mas'ul xodimi Shuhrat Mamadoliyev. - Bu kabi jinoiyatlar jabrlanuvchilarning o'z harakatlari natijasida sodir etilmog'ida. Ya'ni, ijtimoiy tarmoqlarda oson pul topish, shaxsiy ma'lumotlarini oshkor qilish, bank kartasi kodini himoyalamaslik, telefoniga zararli mobil ilovalarni o'rnatish, ijtimoiy tarmoqlarda turli bonusli va konkursli o'yinlarda qatnashish bunga sabab bo'lmoqda.

F.FAXRIDDINOV.

Germaniyaga ketmoqchi ekan..

Globallashuv sharoitida nafaqat yurtimiz, balki boshqa davlatlarda ham farovon hayot ilinjida rizq izlash keng tus olgan. Ammo har ishning o'z tartibi bo'lganidek, biror davlatga chiqishda unga kirish uchun ruxsat olish, muayyan qoidalarga amal qilish talab qilinadi.

Kattaqo'rg'on tumani Jumaboy mahallasi Oltinsoy qishlog'ida yashovchi 1993-yilda tug'ilgan Abdudjalol Abdunazarov Germaniyaga borish uchun "qulay" vaziyatdan foydalanmoqchi bo'lgan...

U joriy yil 22-mart kuni "Vladivostok ish" telegramm mesenjeri guruhiga qo'shilib, guruhda o'zini farg'onalik Muhammadjon deb tanishtirgan shaxsga ishonadi. Uning "pasportingga Germaniya davlati vizasini urdirib barcha hujjatlarni tayyorlataman, buning evaziga 1200 AQSh dollari berasan", deganiga rozi bo'ladi.

A.Abdunazarov pulni viza chiqqanidan keyin berishga kelishib, oldindan 200 AQSh dollari taqdim qiladi. U bu pulni Doniyor Numanovich nomiga ochilgan bank kartasiga tashlab bergan.

E'tibor qiladigan jihat shuki, A.Abdunazarov Muhammadjon bilan faqat "WhatsApp" mesenjeri orqali gaplashgan.

Fuqarolik pasportiga Germaniya davlati vizasi urilgandan keyin 91000 rublning (1000 AQSh dollari) bergan A.Abdunazarov joriy yil 4-iyun kuni uchish uchun "Samarqand-Sheremetevo" aviareysiga aviachipta sotib olgan. "Samarqand" aeroporti nazorat hududidan o'tayotgan vaqtda esa xorijga chiqish biometrik pasportidagi Germaniya davlatiga kirish vizasi qalbaki ekanligi aniqlanib, hujjalashtirishgan.

Holat yuzasidan Jinoiyat kodeksining tegishli moddasi bilan ish qo'zg'atilib, tergov harakatlari olib borilmoqda.

Farrux MO'MINOV,
viloyat transportda xavfsizlikni ta'minlash boshqarmasi xodimi, podpolkovnik.

REKLAMA, E'LONLAR, BILDIRISHLAR / Gazetamiz haftada uch marta - seshanba, payshanba va shanba kunlari chop etiladi / Gazetada chop etilayotgan reklama va e'lonlar tezkor, samarali va hamyonbop / MUHOJAT UCHUN TELEFON: 66-233-91-56

ISSIQLIK TA'MINOTI XIZMATLARI
NARXI O'ZGARMOQDA!

Xalq deputatlari Samarqand viloyati kengashining 2024-yil 1-iyuldagi VI-100-58-7-0-K/24-sonli qaroriga asosan, Samarqand shahri va Nurobod tumanida issiqlik bilan ta'minlovchi korxonalar tomonidan aholiga ko'rsatiladigan issiqlik ta'minoti xizmatlari uchun quyidagi narxlar belgilanmoqda:

Xizmatlar turi	O'Ichov birligi	Taklif etilayotgan narx (ta'rif, so'mda)
Samarqand shahri		
Aholi uchun markaziy isitish (1 kv.metr uchun 1 oyga, QQS bilan)	kv.metr	2 380
Aholi uchun issiq suv ta'minoti (1 ta odam uchun 1 oyga)	bir oyda fuqaro uchun	28 915
Aholi uchun issiq suv ta'minoti hisoblagichi bo'yicha (1 metr kub uchun)	metr kub	7 197
Aholi uchun ta'rif (1 Gkal uchun)	Gkal	130 834
Nurobod tumani		
Aholi uchun markaziy isitish (1 kv.metr uchun 1 oyga, QQS bilan)	kv.metr	5 664
Aholi uchun issiq suv ta'minoti (1 ta odam uchun 1 oyga)	bir oyda fuqaro uchun	78 615
Aholi uchun issiq suv ta'minoti hisoblagichi bo'yicha (1 metr kub uchun)	metr kub	20 208
Aholi uchun ta'rif (1 Gkal uchun)	Gkal	367 338

"ISSIQLIK TA'MINOTI" DUK.

TOPGANGA MUKOFOT!

Muradova Maxaram Kasimovna va Xotamov Farruxbek Nasimjonovich nomidan ishonchnoma asosida Djabarova Djamilya Yakubjanovna o'rtasida Samarqand shahri "Tojimalah" MFY, Abu Bakr Rozi ko'chasi 10-uy, 13-sonli kvartira uchun tuzilgan, Samarqand shahrida xususiy amaliyot bilan shug'ullanuvchi notarius Aliyeva Lola Zoirovna notarial idorasidan 2022-yil 17-iyunda tasdiqlanib, Ksh 087380 SA blankada tuzilgan, 202201714002492 raqam bilan reestrgra kiritilgan oldi-sotdi shartnomasining sotib

oluvchidagi nusxasi Samarqand shahri hududida tushirib qoldirilgan. Ushbu hujjatni topganlardan mukofot evaziga qaytarishlarini so'raymiz.
Telefon: +99895-178-88-35.

Fuqaro Djurakulov Aminjon Aslievichning (Pasport AB 5785023 30.01.2017 yilda Samarqand shahar IIB tomonidan berilgan) haydovchilik guvohnomasi Samarqand shahri hududida tushirib qoldirilgan. Ushbu hujjatni topganlardan mukofot evaziga qaytarishlarini so'raymiz.
Telefon: +99897-927-86-68.

DA'VOLAR BO'LSA...

Samarqand shahrida xususiy amaliyot bilan shug'ullanuvchi notarius Umarov Akmaljon Shavkatovich notarial idorasida marhum Dusmatov Ravshan Bozorovichga (2021-yil 16-dekabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Umarov Akmaljon Shavkatovich notarial idorasiga murojaat etishlarini so'raymiz.

Manzil: Samarqand shahri Abdurahmon Jomiy ko'chasi, 17-uy.

Samarqand shahrida xususiy amaliyot bilan shug'ullanuvchi notarius Ismoilova Shahlo Bahriloyevna notarial idorasida marhum Narzikulov Raxmonga (2018-yil 9-yanvarda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Ismoilova Shahlo Bahriloyevna notarial idorasiga murojaat etishlarini so'raymiz.

Manzil: Samarqand shahri Abdurahmon Jomiy ko'chasi, 17-uy.

Samarqand shahrida xususiy amaliyot bilan shug'ullanuvchi notarius Bahromova Feruza Zoirovna notarial idorasida marhum Botirova Zulfiya Nurilloevnaga (2023-yil 23-oktabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Bahromova Feruza Zoirovna notarial idorasiga murojaat etishlarini so'raymiz.

Manzil: Samarqand shahri Gagarin ko'chasi, 121-uy.

Samarqand shahrida xususiy amaliyot bilan shug'ullanuvchi notarius Nurqosimov Jamshid Sayfiddinovich notarial idorasida marhum Abbasov Djamol Djaxonovichga (2019-yil 16-avgustda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Nurqosimov Jamshid Sayfiddinovich notarial idorasiga murojaat etishlarini so'raymiz.

Manzil: Samarqand shahri Panjob ko'chasi, 4-uy.

Samarqand shahrida xususiy amaliyot bilan shug'ullanuvchi notarius Hazratqulov Mahmud Mo'minqulovich notarial idorasida marhum Eminov Umarga (2012-yil 1-sentabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Hazratqulov Mahmud Mo'minqulovich notarial idorasiga murojaat etishlarini so'raymiz.

Manzil: Samarqand shahri Amir Temur ko'chasi, 36-uy.

Past Darg'om tumanida xususiy amaliyot bilan shug'ullanuvchi notarius Hamidov Norbek Komil o'g'li notarial idorasida marhum Kabilov Tursun Xajnarovichga (2023-yil 5-yanvarda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Hamidov Norbek Komil o'g'li notarial idorasiga murojaat etishlarini so'raymiz.

Manzil: Past Darg'om tumani Juma shaharchasi, Amir Temur ko'chasi, 48-uy.

Samarqand shahrida xususiy amaliyot bilan shug'ullanuvchi notarius Hazratqulov Mahmud Mo'minqulovich notarial idorasida marhum Inakova Galiya Gaysovnaga (2018-yil 10-avgustda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Hazratqulov Mahmud Mo'minqulovich notarial idorasiga murojaat etishlarini so'raymiz.

Manzil: Samarqand shahri Amir Temur ko'chasi, 36-uy.

Samarqand shahrida xususiy amaliyot bilan shug'ullanuvchi notarius Ismoilova Shahlo Bahriloyevna notarial idorasiga murojaat etishlarini so'raymiz.

Manzil: Samarqand shahri Abdurahmon Jomiy ko'chasi, 17-uy.

Samarqand shahrida xususiy amaliyot bilan shug'ullanuvchi notarius Ismoilova Shahlo Bahriloyevna notarial idorasida marhum Saidova Nurxan Xamidovnaga (2023-yil 29-martda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Ismoilova Shahlo Bahriloyevna notarial idorasiga murojaat etishlarini so'raymiz.

Manzil: Samarqand shahri Abdurahmon Jomiy ko'chasi, 17-uy.

BEKOR QILINADI
Sotuvchi "BINOKOR-SHUXRAT" MCHJ nomidan R.G.Pastuxov va sotib oluvchi Mukumov Shaxruz Latifovich o'rtasida Samarqand shahri G'iyosiddin Jamshid ko'chasida joylashgan savdo do'koni va ma'muriy binoning 0001 liter, 1-qavatidagi jami qurilish tagidagi maydoni 31,0 m.kv., foydali maydoni 23,42 m.kv. bo'lgan 2 va 5-xonalar uchun "Best realtor" MCHJ Samarqand mintaqaviy filiali vositachiligida 2019-yil 21-noyabrda to'g'ridan-to'g'ri muzokaralar o'tkazish natijasida tuzilgan 137-sonli kelishuv bayonnomasi va ushbu bayonnomada asosida tuzilgan oldi-sotdi shartnomasining asl nusxasi yo'qolganligi sababli bekor qilinadi.

Sotuvchi "BINOKOR-SHUXRAT" MCHJ nomidan R.G.Pastuxov va sotib oluvchi Mukumov Shaxruz Latifovich o'rtasida Samarqand shahri G'iyosiddin Jamshid ko'chasida joylashgan savdo do'koni va ma'muriy binoning 0001 liter, 2-qavatidagi jami qurilish tagidagi maydoni 79,30 m.kv., foydali maydoni 64,98 m.kv.ni tashkil etgan qismi uchun "Best realtor" MCHJ Samarqand mintaqaviy filiali vositachiligida 2019-yil 21-noyabrda to'g'ridan-to'g'ri muzokaralar o'tkazish natijasida tuzilgan 138-sonli kelishuv bayonnomasi va ushbu bayonnomada asosida tuzilgan oldi-sotdi shartnomasining asl nusxasi yo'qolganligi sababli bekor qilinadi.

Sotuvchi "BINOKOR-SHUXRAT" MCHJ nomidan R.G.Pastuxov va sotib oluvchi Mukumov Shaxruz Latifovich o'rtasida Samarqand shahri G'iyosiddin Jamshid ko'chasida joylashgan savdo do'koni va ma'muriy binoning 0001 liter, 2-qavatidagi jami qurilish tagidagi maydoni 79,30 m.kv., foydali maydoni 64,98 m.kv.ni tashkil etgan qismi uchun "Best realtor" MCHJ Samarqand mintaqaviy filiali vositachiligida 2019-yil 21-noyabrda to'g'ridan-to'g'ri muzokaralar o'tkazish natijasida tuzilgan 138-sonli kelishuv bayonnomasi va ushbu bayonnomada asosida tuzilgan oldi-sotdi shartnomasining asl nusxasi yo'qolganligi sababli bekor qilinadi.

Sotuvchi "BINOKOR-SHUXRAT" MCHJ nomidan R.G.Pastuxov va sotib oluvchi Mukumov Shaxruz Latifovich o'rtasida Samarqand shahri G'iyosiddin Jamshid ko'chasida joylashgan savdo do'koni va ma'muriy binoning 0001 liter, 2-qavatidagi jami qurilish tagidagi maydoni 79,30 m.kv., foydali maydoni 64,98 m.kv.ni tashkil etgan qismi uchun "Best realtor" MCHJ Samarqand mintaqaviy filiali vositachiligida 2019-yil 21-noyabrda to'g'ridan-to'g'ri muzokaralar o'tkazish natijasida tuzilgan 138-sonli kelishuv bayonnomasi va ushbu bayonnomada asosida tuzilgan oldi-sotdi shartnomasining asl nusxasi yo'qolganligi sababli bekor qilinadi.

Samarqand shahridagi "IMOM VOSE" mahalla fuqarolar yig'ini dimaloq muhri yo'qolganligi sababli bekor qilinadi.

Samarqand davlat chet tillar instituti professori, filologiya fanlari doktori Dilorom Salohiy 65 yoshga to'ldi. O'zbek mumtoz adabiyotining ko'zga ko'ringan olimlaridan biri bo'lgan opa bir nechta kitoblarni muallifi, ko'plab yoshlarning ustoz hisoblanadi. Dilorom opaning, ayniqsa, navoiyshunoslik ilmiga qo'shgan hissasi beqiyosdir. Olimani qutlug' yosh bilan tabriklab, ilmiy faoliyatlarida muvaffaqiyatlar tilaymiz!



BUYUK ISHQ, KUYUK KO'NGIL VA BULBULDEK BIYRON SHE'RIYAT

Malik ul-kalom mavlono Lutfiyning ijodi manbalarda yuksak ehtirom bilan tilga olinadi. Jumladan, g'azal mulkingning sulton Nizomiddin Mir Alisher Navoiy o'zining «Muhokamat ul-lug'atayn» asarida Mavlono Lutfiy ijodi turkiy she'riyatning yozma adabiyot an'analari doirasidagi taraqqiyotini boshlab berganligini ta'kidlaydi.

Mavlono Lutfiy ijodi turkiy she'riyatni mumtoz she'riyat darajasiga ko'tarish bilan birga, mumtoz fors-tojik she'riyatiga aks ta'sir ham o'tkazdi. Akademiik B.Valixojayev «Malik ul-kalom Mavlono Lutfiy» nomli asarida bu haqda shunday yozadi: «Abdurahmon Jomiy she'riyati, jumladan, g'azallari ko'zdan kechirilganida uning mavlono Lutfiy uslubiga xos yangiliklarni qo'llab-quvvatlaganining guvohi bo'lish mumkin. Bu esa o'z navbatida, Abdurahmon Jomiyning mavlono Lutfiy an'analari, she'riyatida yangi timsollar yaratish uslubini davom ettirganidan dalolat beradi». Olim fikrining isboti uchun mavlono Lutfiy she'riyatidagi gul, lola, oy, quyosh kabi timsollarning yangicha talqini haqida so'z yuritib, ana shunday hol Abdurahmon Jomiy g'azallarida ham mavjudligiga e'tibor qaratadi. U Jomiyning «Tubiki ba sidra sar baland ast» misrasi bilan boshlanuvchi g'azalini tahlil qilar ekan, g'azalda mahabbatni nihoyatda go'zaligi va unga barcha hayrat bilan boqib, ta'zim qilishi tasvirlanib, bu mavlono Lutfiy she'riyatidagi holat va uslubni eslatadi, deya xulosa qiladi. Abdurahmon Jomiy she'riyatida paydo bo'lgan bu an'ana albat, keyingi fors-tojik she'riyati vakillari ijodida ham qo'llanilgan. Shu jihatdan deydi: «...mavlono Lutfiy merosi va an'anasi faqat turkigo'ylar tomonidan e'zozlanib qolmay, balki forsiygo'ylar tomonidan ham hurmat va ehtirom bilan o'rganilib, uning an'analari o'ziga xos tarzda davom ettirilgan. Bu esa nihoyatda muhim bir hodisadir».

Mavlono Lutfiyning mumtoz Sharq she'riyatiga kiritgan yangiliklari asosan an'anaviy timsollarni yangi, ko'pincha butunlay teskari ma'noli tashbehlar bilan tasvirlash, favqulodda dono, serzavq va kutilmagan badiiy epizodlar yaratish, rasmiy g'azalga xalq og'zaki ijodi an'analari olib kirish kabi hodisalardan iborat. Masalan, gul va tikan obrazlari Sharq she'riyatida nihoyatda tabiiy holat. Ammo Lutfiy an'anaga ko'ra, ijodiy tarzda tasvirlangan gul – go'zallik ramzini salbiy tomondan kashf etilgan «gul – o'g'ri», shuning uchun u jazolangan, mazmunida ifoda etadi:

*Gul qamaringdan o'g'irlab oldi jamol, aning uchun,
Shohi rabe' oni tikan dorig'a o'g'ridek osar.*

Shoir lirikasida o'g'ri tashbehi badiiy timsol ifodasida yangi mazmun yaratish, yangi ruhiy holat paydo qilish maqsadida qo'llaniladi. Chunki shoir an'analari qobig'ida qolib ketishni istamaydi. Gulning o'g'ri shoirning ko'p g'azallarida nuktadonlik bilan kashf etiladi. Masalan:

*Gul eitur ol ila ul chehradin rang,
Qizorsa, o'g'ri uchun el urar kech.*

Qand ham o'g'ri, u shirinlikni go'zal yor lablaridan o'g'irlagan. Shuning uchun el uni yalang'och qilib suvda eritadi:

*Labingdin chun suchukluk qand o'g'irlar,
Solurlar el oni suvg'a yalang'och.*

Ko'z – o'g'ri, oshiq boshiga ishq balosini keltirib, ko'ngulni beqaror qilgan udir:

*Nozukluk ila olding ko'nglumni boqib o'g'rin,
Nozuk kishilarning, ki har ne qilani nozuk.*

Mushk – o'g'ri, u yor sochlaridan xushbo'ylikni o'g'irladi, shu sababdan uni Xo'tanda band etdilar. Shoir bu baytda ham iymoh qilib, ham talmeh bilan Xo'tan ohusiga ishora etyapti:

*Sochingdin chun o'g'urlar mushk xushbo'y,
Qilurlar band-band oni Xo'tanda.*

Go'zal yor husnining o'g'irli shunchalik ko'p ekan, ularni kechirsa bo'ladi. Chunki uning o'zi ham bu illatdan pok emas. Yorning go'zal zulfuri – o'g'ri. Shoir itob qiladi:

*Ey zulfi tun o'g'risiyu la'li labi xuni,
Olam bori bu o'g'riyu ul xunni zabuni.*

Yana: *Ko'nglumni sening zulfung olib*

gizladi, bildim,

O'g'ri kibi el ichra sarafganda dagulmu?

Lutfiy o'z ijodiyotida inson go'zalligini, komil xilqatni vasf etdi. Uning asosiy qahramoni – yer go'zali, insoniyat go'zalidir. Uning uslubi ham nihoyat samimiy, sodda, xalqchidir. Buni shoir o'zi ham e'tirof etadi:

*Ne ko'ngli sodda eldur, ishq elikim,
Seningdek bevafo ni yor derlar.*

Shoir she'riyatida favqulodda donishmandona aytilgan, kutilmagan yangi tashbehlar bilan ziynatlangan shohbaytlar, lavhalar juda ko'p. Mana bu baytda yangi bir tashbeh namoyon bo'lgan:

*Chun kishining qonin ayturlarki, yotmas, ne ajab,
La'lingizda ne uchun mundaq yotur*

qonim mening?

Ba'zan shoir mubolag'ada "g'uluv"ga ketadi. Ammo ko'p maqtalmagan bu san'at ham shoir qalami bilan chiroyli, sodda, xalqona ohang kasb etadi:

*Gar vatan Lutfiy ko'zinda tutmading,
yo'qtur ajab,*

Ev qo'pormog'liq erur dushvor Jayhun ustina.

Ya'ni, garchi Lutfiy ko'zining qarog'ida ko'rinning – yoniga kelmadim – bunday qilolmasding, albatta, ajablanarli joyi yo'q. Chunki Lutfiy ko'zlarini yor vaslin istab tinmay yosh to'kmoqda Jayxun daryosi kabi. Jayxun ustida uy qurmoq osonmi?!

Oddiy, hayotiy, turkona lavhalarini mumtoz g'azal darajasida tasvirlab berishda mavlono Lutfiy yuksak mahorat va uslubni namoyish etadi. U sodda hayotiy hodisalardan mukammal badiiy ifodani, oddiy voqeadan murakkab san'atni yuzaga keltiradi. Mana misollar:

*Etak yig'ib yurusa, jilvasi balo qiladur,
O'tarda yeng solishi elni*

mubtalo qiladur. ...

Erur jahon ko'zidin g'uncha

og'zidek maxfiy,

Dudog'i jonima ulkim kulo-kulo qiladur.

Yoki yana:

*Itning zikri doyim xayr ila o'lsun,
afollohkim,*

*Sanga ahvoli zorimni kecha
ko'rgach xabar qildi.*

Mavlono Lutfiy she'riyati faqat ishqiy kechinmalardan, visol va hijron tasvirlari, oshiq va ma'shuqa muammolari yig'indisidan iborat bo'lmay, unda axloqiy, tarbiyaviy ko'rsatmalar, pand-o'gitlar ham mavjud. Shoir qalbida shafqat, rahmlik tuyg'usi bo'lmagan, dili qat-tiq kishilarni quyoshchalik nurga boy bo'lsa ham jamiyat hayoti uchun keraksiz, foydasiz deb hisoblaydi. U oshiqona g'azal qat-qatiga o'zining ma'rifiy fikrlarini singdirib yuboradi:

*Kishikim, yo'qturur mehru vafosi,
Agar xurshiddur andin ne hosil?!*

Mavlono Lutfiyning dilbar hayotsevar, ijodiy merosini taniqli adabiyotshunos olimlar Sodirxon Erkinov, Erkin Ahmadxo'jayev, Boturxon Valixojayevlar keng va batafsil tahlil etib bergan. Bu olimlar Lutfiyning hayoti va adabiy merosi haqida yirik tadqiqotlar yaratib, shoir merosini fanga va xalqqa taqdim etishda katta xizmat qilganlar.

Malik ul-kalom mavlono Lutfiyning buyuk ishq, kuyuk ko'ngil va bulbuldek biyron til bilan yaratilgan she'riyati ummoni bizga adabiyotning go'zalligi va latofanini namoyon etadi:

*Bir kun ul husn elining sultoni
solg'ay deb quloq,*

Ishq Lutfiyning so'zini durri

maknun ayladi.

**Dilorom SALOHIIY,
SamDChTI professori,
O'zbekistonda xizmat ko'rsatgan
yoshlar murabbiysi.**

Ertak

real hayot bu

“O'zbek sehri eraklari tipologik katalogi”ni o'qib

Tajriba shuni ko'rsatyaptiki, biz bilmagan narsamiz to'g'risida tasavvurlarimizni turlicha talqin qilaveramiz. Misol uchun eraklar haqida. Bizning avlod, umuman, ota-bobolarimiz erak eshitib, erak aytib yashagan. Bugungi avlod uchun cho'pchakka o'xshab tuyulgan ana shu eraklar har bir nasihatdan, dakkidan ustun turgan. Chunki ularning mazmuni ruhiyatimizga singgan. Ertaklarga ishonishimizning sababi shundaki, ular murakkab holatlarda vaziyatdan qanday chiqishni o'rgatgan. Ming afuski, biz adabiyotimizdagi bunday ommabop janr imkoniyatlaridan yetarlicha foydalana olmayapmiz. Vaholanki, rivojlangan davlatlarda eraklar asosida yaratilgan badiiy filmlarni katta-yu yosh birdek ishtiroq bilan tomosha qilmoqda.

Ana shu nuqtai nazardan qaraganda, germaniyalik tadqiqotchi Gabrielye Keller va o'zbekistonlik olimlar Xurram Rahimov hamda Mamatqul Jo'rayevlar hamuallifligida yaratilgan ikki jildlik o'quv qo'llanmasi sohadagi chinakam inqilob bo'ldi, desak arziydi. Chunki ular o'zbek xalq eraklarining mazmun-mohiyati, ijtimoiy hayotdagi o'rni, topilmalar, obrazlarning inson ruhiyatiga ta'siri, eraklarning davr ruhiga mos o'zgarib turishi to'g'risida puxta tasnif yaratishgan.

Ushbu qo'llanmaning yozilishiga 2017-yil Samarqand shahri kunida fotiha berilgan edi. “El merosi” teatrida professor Y.Abdullayev raisligida o'tgan davra suhbatiga Samarqand shahri faxriy fuqaroligini olgan Gabrielye xonim tashrif buyurib, o'zbekistonlik olimlar bilan sehri eraklarimiz katalogini yaratishga bel bog'laganligini ma'lum qildi. Darvoqe, olim bundan avval Alisher Navoiy hayoti va faoliyati bilan jiddiy qiziqqan, bu to'g'risida bir qator ilmiy xulosalar bergan, alloma g'azallaridan nemis tiliga o'girib ulguragan edi. Muhimi, u O'zbekistonni, uning xalqini hurmat qilgani uchun tilini va adabiyotini tadqiq qila boshlaganini aytgan edi.

Mualliflar ushbu qo'llanmani yaratish jarayonida mamlakatimizning turli burchaklarida o'zidan og'izga ko'chib kelayotgan eraklarni yozib olishgan, bu

eraklarning matnlarini tahlil qilishgan. Xususan, uning epik xususiyatlari, ijodiy yondashish yo'nalishi hamda qahramonlarning tinglovchi ruhiyatiga ta'siri masalalarini puxta o'rganishgan. Jumladan, eraklardagi “sehri raqiblar”, “sehrlangan hamrohlar”, “sehri vazifalar”, “sehri yordamchilar”, “sehri buyumlar” kabi holatlar dunyo erakchiligi va xalqimiz tarixidagi evrilishlar jarayoni bilan bog'liq holda tadqiq etiladi. Mualliflar dunyo erakchiligida amalga oshirilgan bunday ishlar yuzasidan ham ma'lumot berishgan.

Darhaqiqat, erak ijtimoiy tarimoqda ayrimlar ta'kidlaganidek, cho'pchak yoki xayoliy narsalar emas. Erak to'qima holat ham emas. U xalqimizning avloddan avlodga, o'zidan og'izga o'tib kelayotgan ta'sirli tarbiyaviy vositasidir. Ertaklardagi qahramonlar hammasi ramziy ma'noga ega. Ular inson ongidagi, shuuridagi keskin o'zgarishlarni ifoda etadi. Jumladan, ajdaho – bu shunchaki yirtqich emas, balki fe'limizda, ko'nglimizda paydo bo'lgan yomon odatlardir. Odamlarni murakkab vaziyatdan olib chiqib keta oladigan qahramonlar esa aql-zakovatning timsolidir. Binobarin, eraklar dunyoda hamisha yaxshi va yomon, yolg'onchi va halol baqamti yashashini (“qarg'a – qaqimchi ekan, chumchuq – chaqimchi ekan”) aytish barobarida qaysi fe'l-atvor va harakatlarni odamlarga yaxshilik keltirishini tushuntirib boradi. Shu jihatdan olganda o'zbek xalq eraklarining ushbu tasnifi adabiyotimiz xazinasiga qo'shilgan munosib ganjinadir.

Farmon TOSHEV.

Samarqandlik san'atkorlar “II Xalqaro maqom san'ati anjumani”da faol ishtirok etdi

Joriy yilning 27-30-iyun kunlari Jizzax viloyatining Zomin tumani-dagi “Zominsoy” dam olish majmuasida II Xalqaro maqom san'ati anjumani bo'lib o'tdi. Ikkinchi marta o'tkazilgan anjumanda 80 ga yaqin davlatdan 400 nafardan ortiq ishtirokchi jam bo'ldi. Ular orasida viloyatimizdan 100 nafarga yaqin maqom san'ati vakillari, ansambl jamoalari, hunarmandlar va soha mas'ullari ishtirok etdi.



Zomin anjumanida jamoamiz xonanda va sozandalari bilan birgalikda maqom san'atining o'lmas mumtoz navolarini ijro etib, “Eng yaxshi maqom ansambli”, “Eng yaxshi yakkaxon cholg'u ijrochisi” va “Eng yaxshi yakkaxon xonanda” nominatsiyalari bo'yicha tanlovlarda faol ishtirok etdik.

Gran-pri sovrini Eron Islom Respublikasining “Fors” ansambli solisti Ali Asg'ar Arabshohiyga nasib etdi. Ansambl jamoalari orasida birinchi o'rinni O'zbek milliy maqom san'ati markazi Yunus Rajabiy nomidagi ma-

qom xonandalari ansambli egalladi. Yakkaxon ijrochiligi bo'yicha Tojikiston milliy konservatoriyasi guruhi yakkaxon ijrochi solisti Xurshid Ibrohimzoda g'olib bo'ldi. Tadbir doirasida tashkil etilgan xalqaro musiqa yarmarkasi, maqom san'atiga oid turli ko'rgazmalarda viloyatimiz madaniyat va san'at xodimlari hamda hunarmandlari faol ishtirok etdi. Anjuman yakunida yurtimizning bir guruh soha fidoyilari “Madaniyat va san'at fidokori” ko'krak nishoni bilan taqdirlandi.

**Abdunabi TO'XTAYEV,
O'zbek milliy maqom
san'ati markazi viloyat hududiy
bo'limi direktori.**

SHU OYDA TAVALLUD TOPGANLAR

7-IYUL

Normurod NARZUL-LAYEV – (1934-2006) Qashqadaryo viloyati Kasbi tumani-dagi tug'ilgan. O'zbekiston xalq shoiri.

8-IYUL

Qo'chqor QARSHI-YEV – (1923-1945) yilda Ishtixon tumani-dagi tug'ilgan. Ikkinchi jahon urushi qatnashchisi, qahramon.

9-IYUL

Bekmurod YO'LDO-SHEV – (1947-2017) Paxtach tumani-dagi tug'ilgan. Filologiya fanlari doktori.

10-IYUL

Toshpo'lat TUGA-LOV – 1964-yilda Urgut tumani-dagi tug'ilgan. O'zbekiston yozuvchilar uyushmasi a'zosi.

MUASSIS: Samarqand viloyati hokimligi

Bosh muharrir: Farmon TOSHEV

Gazeta O'zbekiston matbuot va axborot agentligining Samarqand viloyat boshqarmasida 2012-yil 30-martda 09-01 raqam bilan ro'yxatga olingan. Nashr 100. Indeks 438. 11 674 nusxada chop etildi. Buyurtma 347. Hajmi 2 bosma tabaq, bichimi A-2

Gazeta haftaning seshanba, payshanba va shanba kunlari chiqadi.

QABULXONA: (66) 233-91-51, REKLAMA VA E'LONLAR: (66) 233-91-56

BO'LIMLAR: (66) 233-91-57, 233-91-58, 233-91-59, 233-91-61

MANZILIMIZ: 140100, Samarqand shahri, Ulug' Tursunov ko'chasi, 80-uy, Matbuot uyi.

Gazeta «Zarafshon» tahririyatining kompyuter bo'limida sahifalandi.

«Noshir lux» MCHJ bosmaxonasida chop etildi.

Korxonalar manzili: Samarqand shahri, Spitamen ko'chasi, 270-uy.

Bosishga topshirish vaqti:

soat 18:30 da.

Bosishga topshirildi:

soat 19:00

Navbatchi muharrir:

G'.HASANOV.

Navbatchi:

F.RO'ZIBOYEV.

Sahifalovchi:

B.ABDULLAYEV.



Saytimizga o'tish uchun QR-kodni telefoningiz orqali skaner qiling

ISSN-201667X



Sotuvda narxi kelishilgan holda

